

ANEXO

4. Condicións ambientais

No desenvolvemento do proxecto aplicaranse as medidas protectoras, correctoras e de vixilancia ambiental propostas na documentación presentada polo promotor na tramitación ambiental, tendo en conta así mesmo as seguintes condicións que complementan, matizan ou subliñan as anteriores:

4.1. Protección da atmosfera

4.1.1. En canto ás emisións de po e gases á atmosfera

1. A maquinaria a empregar cumprirá coa normativa de emisións que lle resulte de aplicación, debendo dispor de documentación acreditativa ao respecto, así como a ITV en vigor.
2. Intentarase que as actuacións se leven a cabo en días de pouco vento, para reducir a xeración de po e perda de solo.
3. A fertilización orgánica efectuarase en días sen chuvia, sempre que tampouco teña chovido no día anterior e non se esperen chuvias no día posterior ao día da aplicación. En caso de que se trate de fertilizantes orgánicos en fase líquida (xurros), a aplicación será soterrada, e no caso de fertilización orgánica sólida (esterco) deberase roturar e voltear nun máximo de 48 h desde a súa aplicación no terreo.

4.1.2. Co obxectivo de diminuír as molestias por ruído

1. Evitarase a realización dos traballos mecanizados durante o período nocturno, debendo respectar os horarios de descanso das poboacións máis próximas.
2. Deberán respectarse os valores establecidos no Real Decreto 1367/2007, de 19 de outubro, polo que se desenvolve a Lei 37/2003, de 17 de novembro, do Ruído, que sexan de aplicación, así como o Decreto 106/2015 sobre contaminación acústica de Galicia.

4.2. Protección do solo e infraestruturas

1. Contemplanse as medidas preventivas e correctoras necesarias para evitar derrames de aceites, carburantes ou outros compostos contaminantes ao solo. Prestarase especial atención ao parque de maquinaria e ás zonas de tránsito dos vehículos.
2. As actividades de mantemento da maquinaria empregada farase en lugares adaptados para tal fin, e nunca na parcela ou nas inmediacións desta.
3. Deberanse adoptar as medidas que garantan a estabilización de forma adecuada dos solos alterados polo tránsito da maquinaria, evitando a erosión e o posible arrastre de materiais coa auga de escorrenta.
4. A fertilización do terreo executarase tendo en conta as características do solo e a necesidade dos cultivos implantados, axustando as cantidades para evitar por tódolos medios excedentes e acumulación no terreo, así coma posibles verteduras aos cursos de auga por arrastres por escorrenta superficial.

4.3. Xestión de residuos

1. Queda prohibida a queima de restos ou calquera outro tipo de material durante todas as fases do proxecto.
2. Os restos vexetais xerados serán triturados preferentemente, mediante pase de rozadoira e posteriormente distribuídos polo terreo.
3. Todos os residuos que se xeren como consecuencia da execución, mantemento ou no seu caso, desmantelamento, deberán ser xestionados en función da súa natureza e conforme a lexislación vixente, primando a reciclaxe ou reemprego fronte ao vertido. Do mesmo xeito tampouco se pode facer calquera tipo de vertedura de residuos independentemente da súa natureza en todo o entorno de actuación, sendo o seu destino os xestores autorizados.
4. Deixarase libre de pedras ou outros obstáculos a rede de drenaxe da parcela, para evitar obstrucións e asolagamentos que favorezan a erosión do solo.



4.4. Protección da fauna e da vexetación e outros valores naturais

1. Manteranse no estado actual as áreas de reserva recollidas no documento ambiental.
2. Preservarase a mouteira 1 (0,9610 ha) por constituír o hábitat de interese comunitario 9230 (Carballeiras galaico-portuguesas de *Quercus robur* e *Quercus pyrenaica*) en estado favorable de conservación.
3. Se durante a execución e explotación do proxecto se detecta ou demostra calquera afección significativa sobre os valores naturais da zona, tomaranse inmediatamente as medidas adecuadas para paliar dita afección e será a Dirección xeral de Patrimonio Natural por medio do Servizo de Patrimonio Natural de Ourense quen decidirá sobre a conveniencia da solución a adoptar, así como as actuacións precisas ou as medidas compensatorias adecuadas para corrixir os efectos producidos.
4. Calquera modificación do proxecto que teña algunha afección sobre o medio natural requirirá o informe correspondente.

4.5. Patrimonio Cultural

Conservarase a sebe de arborado que limita a parcela polo sur, aos efectos de manter a integración actual da parcela na paisaxe e evitar afeccións visuais no Camiño de Santiago (Camiño do Norte, Ruta da Costa) na fase de execución do proxecto.

4.6. Integración paisaxística e restauración

Respectarase o indicado no documento ambiental con respecto á faixa de arboredo nas marxes noroeste e sueste da parcela, así coma a proposta de que en caso de que necesiten peches, estes serán construídos de acordo aos valados tradicionais presentes na zona.

4.7. Protección ante accidentes graves ou catástrofes

Teranse en conta as normas ou recomendacións que o Concello de Boimorto, ou o órgano competente, teña establecidos ou poidan ditar en materia de riscos, de acordo coa Lei 17/2015, do 9 de xullo, do Sistema Nacional de Protección Civil e a Lei 5/2007, do 7 de maio, de emerxencias de Galicia.

4.8. No relativo á protección das augas e leitos fluviais

1. A acumulación temporal de materiais e restos de vexetación situaranse fóra das áreas de escorrenta natural do terreo, de forma que non poidan ser arrastrados polas augas en caso de enchentes ou chuvias intensas.
2. Durante a fase de explotación do terreo, en caso de que para o mantemento se empreguen abonos ou se realice extensión de esterco e/ou xurro, deberase gardar a devida distancia dos cursos de auga existentes no entorno da parcela que poden ser afectados, e aplicarase o Código Galego de Boas Prácticas Agrarias.

4.9. Programa de vixilancia e seguimento ambiental

1. O promotor e o órgano substantivo garantirán o cumprimento de todas as medidas preventivas, protectoras e correctoras recollidas no documento ambiental, e que se leven a cabo coa periodicidade adecuada. Ademais, terase en conta o seguinte:
 - Revisarase minuciosamente e previo ao inicio da actuación que non haxa presenza de especies de flora e fauna catalogadas na parcela obxecto de actuación, poñendo especial énfase na detección de niños, pegadas ou calquera outra mostra da súa presenza no entorno.
 - Balizarase sobre o terreo a mouteira 1, así coma as outras zonas excluídas do cambio de uso e verificarase que no sexan afectadas.
2. Contarase cun técnico ambiental que se encargará e certificará o cumprimento do plan de vixilancia ambiental durante a fase de instalación e posterior explotación.
3. Estas medidas deberán quedar definidas a nivel executable, incluíndose nos correspondentes planos e a planificación temporal, debendo ademais, estar presupostadas do mesmo xeito que o conxunto do proxecto.



4.10. Outras consideracións

Na fase de abandono, recolleranse todos aqueles elementos artificiais, que serán xestionados de acordo coa lexislación vixente en materia de residuos, e a superficie de actuación será repoboada con especies autóctonas de ecotipos locais.

